

Si Glenbert no por bira Ministro, tin mas cu tambe no por:

Ken ta screen ken y con?

ORANJESTAD(AAN) Despues cu cabez di OLA a ser bati pa loco den tur sentido y Glenbert Croes mester a paga e prijs pa pifianan cu el a comete, pero por lo menos e tabata tin e curashi grandi pa admiti su eronan, awor un wega hopi sushi ta worde hunga pa asina scapa otronan cu tin seroe di manteca riba nan cabez.

Glenbert Croes su problema no ta sinta den e investigacionnan cu tin riba su ministerionan y particularmente e investigacion cu tin riba DOPV pasobra te awor aki ta acusacionnan y sospechonan so tin riba e ministro aki y e ministro a bisa bon cla cu e no tin miedo di cualkier caso den corte.

E problema mas grandi cu Glenbert Croes a haya su mes y su partido confronta cune ta cu, e ministro aki, bisa su bon bisa su malo, tabata e unico yiu di tera den posicion di mandatario cu a lanta para y para Hulanda ora cu derechonan y autonomia di pais Aruba tabata na peliger.

E problema grandi di Glenbert Croes ta cu su persona como ministro no a bay na amen di instancianan financiero Hulandes cu a trata todo por todo pa asina logra haya

proyecto di Aeropuerto.

E problema grandi di Glenbert Croes ta cu el a cuestiona fuertemente y cu tur su razon, e deal di NIB cu WEB, cu a costa pueblo miyones mas cu tabata necesario.

Unda Manchi como ministro di finanzas a keda pa bisa pueblo cu e deal cu NIB pa WEB ta sali Aruba demasiado caro y mihor lo tabata pa deal cu e mesun compania cu a financia Aeropuerto?

E problema grandi di Glenbert Croes ta cu el a logra di haya financiamiento di 8 % pa proyecto di Aeropuerto siendo cu WEB a financia su proyecto via Hulanda y NIB pa mas cu 11%.

E diferencia grandi aki cu Glenbert Croes a muestra pueblo riba dje, tabata e problema grandi pa Hulanda y ta pesey awe e mester worde castiga.

Caminda hende ta traha eronan ta worde cometi, pero ta di con eronan di un solo ministro ta pisa manera beton y pegamento di barco y te hasta dealmento cu criminalnan no ta pisa nada pa otro, cu

otro ministoronan manera Henny Eman cu a tuma placa di Spartaco Ghini, si por bira informado, formador y te hasta pasa screening pa asina bay duna cuenta na Gobernador, pa asina Gobernador di Aruba haya su mes pega cu e problema pa finalmente Hulanda cu gana por pasa e hacha riba cabez di Glenbert Croes y OLA.

Ministoronan di AVP manera Watty lamentablemente ta den un situacion di salud cu no ta bon y segun reglanan cu Henny mes a cumbini cu Hulanda, ministoronan mester ta den un bon estado di salud pa nan por worde huramenta.

Un ministro nobo tin negoshi cu ta deal cu schoolnan y esaki no ta forma un conflicto di interes, cu segun reglanan nobo cu Hulanda y Henny Eman a impone riba Aruba, no por y ta pone cu e ministro aki tampoco por huramenta?

Prome Ministro di Aruba Henny tin negoshi y Ike Posner tambe tin vinculonnan cu negoshi di su famia (riba cual no tin nada contra), pero am-

bos si a pasa e screening y pa ambos no tin conflicto di interes!

Activistanan di OLA tabata puntra ayera si e negoshi di famia di un candidato di AVP a worde menciona den e caso cu Merca tin contra primonan Mansur, anto con ta posibel cu e candidato di AVP si por a pasa screening?

Spartaco Ghini a declara bao di huramentacion ora cu nan a sake di prison for di Italia y hibe Aeropuerto na Hulanda pa basha abao, el a bisa bon cla cu Henny Eman y su partido a tuma placa di dje y despues cu Landsrecherche a investiga esaki, Henny Eman mes a admiti di a tuma placa di Spartaco Ghini y awe Henny Eman si por pasa e screening?

Bill Clinton su partido cu tambe a tuma placa di un persona cu a haya su mes confronta cu husticia Mericano a duna placa bek, pero Henny Eman y AVP no a debilbe e placa mas leu cu hende sa na Aruba!

Ministro Tico Croes tambe tin investigacion di parlamento riba Radisson y Tico si

a pasa screening y Glenbert cu tambe tin investigacionnan riba su cabez si no por huramenta!

Ta unda nos ta bay cu e midimento aki cu dos midi: uno colonial y uno di persecucion!?

Henny Eman como formador di gobierno por lanta carpachi mes for di santana y manda dilanti pa huramenta, pero ta Ministerio Publico mester aplica e reglanan cu Henny Eman a cumbini cu Voorhoeve y aki ta caminda e sapato ta primi dos banda.

Ta con PG por bay hustifica esaki?

Ta con e screening a ser haci y ta di con un ministro so ta haya tur culpa riba su cabez y otronan por sali limpi?

Hilaridad di bida y e berguenza mas grandi na Aruba y den Reino ta muestra pueblo awe, cu cualkier yiu di tera cu lanta para contra Hulanda ta worde persigui y esaki ta worde haci cu ayudo di Arubianonan mes den politica na Aruba, mientras cu nan ta laba man formal manera Pontius Pilatus pa asina otro worde crusifica.

TELEGRAM DI P.P.A.

PA PARTIDO O.L.A.

ORANJESTAD (AAN): Miembro di directiva di Partido PPA, esta Venancio Maduro, a manda un telegram pa lider di Partido OLA, esta Glenbert Croes.

Den e telegram, PPA ta protesta contra e hecho cu OLA a sacrifica votadornan di San Nicolas durante proceso di formacion di Gobierno entregando e cartera di Salubridad Publico.

E peticion di Partido OLA na Willem Vrolijk pa e entrega su asiento di Parlamento y bay Hulanda ta otro decision encontra di interes di votadornan di San Nicolas y vecindario. San Nicolas como parti di Aruba merece su representacion tambe.

**TELEFONNAN
DI DIARIO
826747
FAX
828551**